

Meeqqat tapersorsorneqarnissaannut Namminersorlutik Oqartussat nalunaarutaat

Meeqqat tapersorsorneqarnissaannut Inatsisartut inatsisaanni nr. 20, 26. juni 2017-imeersumi § 22, imm. 5, § 30, imm. 4 - 5, § 43, imm. 4, § 44, imm. 5, § 45, imm. 7, § 46, imm. 8, aamma § 60, imm. 3 naapertorlugin aalajangersarneqarput:

Kapitali 1

Isumaginninnikkut misissuineq

§ 1. Meeraq immikkut tapersorsorneqarnissamik pisariaqartitsisoq kommunalbestyrelsip paasiguniuk, meeqqap atugai pillugit isumaginninnikkut misissuinerlik kommunalbestyrelse suliaqassaaq. Meeqqap immikkut tapersorsorneqarnissamik pisariaqartitsinera kommunalbestyrelsip ima ilisoqarneratigut paasisinnaavaa:

- 1) nalunaarutiginnittooqarneratigut,
- 2) nakkutilliinikkut, imaluunniit
- 3) allatulluunniit.

Imm. 2. Angajoqqaat misissuisoqarnerani sapingisamik akuutinnejqarnissaat kommunalbestyrelsip isumagissavaa, angajoqqaat imaluunniit isumassuisut allat taamaallillutik sunniuteqaqataallutik peqataasinnaaqqullugit.

Imm. 3. Isumaginninnikkut misissuinermi meeraq akuutinnejqassaaq. Kommunalbestyrelse naliliissaq, sapingisamik angajoqqaat peqataatinnejqassapput, meeraq qanoq annertutigisumik akuutinnejqassanersoq, meeqqap kissaatai, perungassusia sunalu meeqqamut pitsaanaerpaanersoq tunngavigalugit. Meeqqap isumai meeqqap ukiuinut perungassusianullu naapertuuttumik pingaaruteqartinneqassapput.

§ 2. Kommunalbestyrelsip isumaginninnikkut misissuineq oqartussaasoqarfut assigiinngitsunik suliallit suliniuteqartinnerisigut suliarissavaa. Ulluunerani paaqqinnitarfut, atuarfut, politiit, peqqinnissaqarfik pisortallu oqartussaasut susassaqartut, meeqqamik angajoqqaavinilluunniit ilisimasaqartut ilisimasaat pigineqareersut misissuinermi ilanngunnejqassapput.

Imm. 2. Meeqqap ilaqtariillu atugarisaat tamarmiusut isumaginninnikkut misissuinermi ataatsimut nalilersuiffingineqassapput. Suliami pineqartumi pingaaruteqartutut isigineqarpata, pingaarutillit makku isumaginninnikkut misissuinermi ilanngunnejqassapput:

- 1) Meeqqap pissusilersornera, ukiuminut naleqquttumik tamatigut alliartornera ineriantorneralu.
- 2) Meeqqap ilaqtariinni atugarisai, matumanii ilaqtariit attaveqarfilla katitigaaneri ilanngullugit.

3) Meeqqap ulluunerani paaqqinnittarfimmiiinneranut atuarneranulluunniit tunngasut.

4) Meeqqap peqqissusaanut tunngasut.

5) Meeqqap sunngiffimmi atugarisai ikinnguteqarneralu.

6) Pissutsit attuumassuteqartut allat.

Imm. 3. Meeqqamut ilaquaanullu iliuusissat naleqquttut suunersut, isumaginninnikkut misissuinerup qulaajarlugillu nassuiassavai. Kommunalbestyrelsip meeqqap ilaquaasalu attaveqaqatigisagaannut tunngasut tassunga atatillugu qulaajassavai, attaveqaqatigisagaasa nukissaqartut akuutinneqarsinnaanerat nalilersinnaajumallugu.

Imm. 4. Isuimaginninnikkut misissuinerup ilutigisaanik iliuusissamik aallartitsisoqarsimappat, iliuuserineqartut ingerlatiinnarneqassanersut isummerfigineqassaaq.

Imm. 5. Isuimaginninnikkut misissuinermut atatillugu immikkut isummerfigineqassaaq ilaqtariit allanik meerartaqarpata, meeqqat allat pillugit misissuisoqassanersoq.

§ 3. Kommunalbestyrelsip meeqqap immikkut tapersorsorneqarnissamik pisariaqartitsineranik paasitinneqarnerata kingorna kingusinnerpaamik qaammatit marluk qaangiunneranni, isuimaginninnikkut misissuineq naammassineqassaaq. Isuimaginninnikkut misissuineq naammassineqarpat iliuuseqartoqassanersoq suliarluunniit inaerneqassanersoq allaganngorlugu aalajangiisoqassaaq.

Imm. 2. Isuimaginninnikkut misissuineq qaammatit 2-t qaangiutsinnagit naammassineqarsinnaanngippat kommunalbestyrelsip naliliinerugallartoq suliarissavaa, tamannalu pillugu kiisalu misissuinerup naammassineqarnissaa ullormi sumi naatsorsuutigineqarnersoq angajoqqaatut akissussaasumut allakkatigut ilisimatitsissutit nalunaarutigalugu.

Kapitali 2

Iliuusissatut pilersaarutit

§ 4. Kommunalbestyrelse meeqqap tapersorsorneqarnissaa pillugu aalajangiinnginnermini iliuusissatut pilersaarummik allaganngorlugu suliaqarnissamut pisussaavoq.

Imm. 2. Imatut pisoqartillugu iliuusissatut pilersaarut allaganngorlugu tamatigut suliarineqartassaaq:

1) Meeqqat tapersorsorneqarnissaannut Inatsisartut inatsisaat § 45 naapertorlugu, isuimaginninnikkut misissuinermut atatillugu.

2) Makkuningga aalajangiisoqannginnerani:

a) Meeqqat tapersorsorneqarnissaannut Inatsisartut inatsisaat § 25 naapertorlugu immikkut ittumik ikorsiissutinik aallartitsineq,

b) Meeqqat tapersorsorneqarnissaannut Inatsisartut inatsisaat § 26 naapertorlugu angajoqqaanngortussanut ikorfartuinissamik aallartitsineq,

c) Meeqqat tapersorsorneqarnissaannut Inatsisartut inatsisaat §§ 27 aamma 28 naapertorlugit inissiineq,

d) Meeqqat tapersorsorneqarnissaannut Inatsisartut inatsisaat § 40 naapertorlugu immikkut ittumik ikorsiissutinik unitsitsineq,

e) Meeqqat tapersorsorneqarnissaannut Inatsisartut inatsisaat § 42 naapertorlugu, suliniuteqareernermi malitseqartitsinissamik aallartitsineq, imaluunniit

f) Meeqqat tapersorsorneqarnissaannut Inatsisartut inatsisaat § 40 naapertorlugu suliniuteqareernermi malitseqartitsinermik unitsitsineq.

§ 5. Isumaginninnikkut misissuinermi ajornartorsiutit qulaajarneqartut, kommunalbestyrelsillu ukkatarerutai kisiisa iliuusissatut pilersaarummi ilaatinneqassapput.

Imm. 2. Angerlarsimaffiup avataanut inissiinissaq pillugu iliuusissatut pilersaarut meeqqap angajoqqaavisu imminnut najortarnissaannik imaqqasaaq, matumani nunap ilaani inissiineq angajoqqaanut ungassisumiippat tikeraartarnissat ilanngulligit.

§ 6. § 4 naapertorlugu iliuusissatut pilersaarut angajoqqaatut akisussasup imaluunniit isumassuisut allat kiisalu meeqqap oqaloqatignerisigut suleqatignerisigullu suliarineqartussaavoq.

Imm. 2. Angerlarsimaffiup avataanut inissiisoqartillugu ikorsiissutip siunertaa anguniagaasorlu meeqqamut angajoqqaatullu akisussaasumut ilisimatitsissutigineqassapput. Meeqqamut paasisitsineq meeqqap ukiuinut pisinnaassusianullu naapertuuttumik pissaaq.

Imm. 3. Meeqqat tapersorsorneqarnissaannut Inatsisartut inatsisaat § 27 naapertorlugu, akuersissutip suliarineqarnera atsiorneqarneralu kommunalbestyrelsip suliarissavaa. Angerlarsimaffiup avataanut inissiisoqartillugu, tamanna pisumi pingaartinneqarpat, inissiinerup siunertaata anguniagaasullu ilisimatitsissutigineqarsimanerat akuersissummi allassimassapput.

§ 7. Meeqqap angerlarsimaffiup avataanut inissinniarneqarneranut atatillugu, piffissami meeqqap angerlarsimaffiup avataanut inissinneqarfiani, piffissamilu meeqqap angerlartinneqarfiata kingorna, ilaqtariinnut immikkut ikorsiissutit suut aallartinneqassanersut, iliuusissatut pilersaarummi allaaserineqassapput.

Imm. 2. Suliniutit inatsisit allat naapertorlugit aallartinneqartut ilaqtariinnut ikorsiinerup allaaserineqarnerani ilanngunneqarsinnaapput.

§ 8. Meeqqap angerlarsimaffiup avataanut ilaqtariinnut paarsisartunut imaluunniit ulloq unnuarlu paaqqinniffimmut inissinneqarnissaanik kommunalbestyrelse aalajangiippat, iliuusissatut pilersaarutip imai naleqquttut ilaqtariinnut paarsisartunut imaluunniit ulloq unnuarlu paaqqinniffimmut kingusinnerpaamik meeqqap tikinnerani tunniunneqassapput.

Imm. 2. Sivisunerusumik nukinginnartumik inissiisoqartillugu meeqqamut iliuusissatut pilersaarutip imai naleqquttut inissiinerup kingorna kingusinnerpaamik ullut 14-it qaangiunneranni nassiunneqassapput.

Imm. 3. Meeqqap angerlarsimaffiup avataanut efterskolimut inissinneqarnissaanik kommunalbestyrelse aalajangiippat, efterskolimi inissamik qinnuteqaatip suliarineqarnerani atugassatut, iliuusissatut pilersaarutip imai naleqquttut efterskolip aqutsisuinut nassiunneqassapput.

§ 9. Meeqqap inunnut aalajangersimasunut, matumani angajoqqaatut akisussaasut ilanngulligit, attaveqartanginnissaa kommunalbestyrelsip aalajangerpagu, aalajangerneq aamma iliuusissatut pilersaarummi allassimassaaq.

Kapitali 3

Meeqqamik oqaloqatiginninnej

§ 10. Meeqqat tapersorsorneqarnissaannut Inatsisartut inatsisaat § 43 naapertorlugu meeqqamik oqaloqatigininnermut atatillugu makku meeqqamut ilisimatitsissutigineqassapput:

- 1) tapersiissuteqarneq aallartinneqassanersoq communalbestyrelse aalajangiinissaminut pisussaaffeqartoq, aamma
- 2) naammagittaallior sinnaanermut periarfissaqartoq.

Kapitali 4

Meeqqanik illersuisut isumaginninnerup iluani ilisimasallit

§ 11. Meeqqanik illersuisup isumaginninnerup iluani ilisimasallip meeraq isumaginninnermi suliassaqarfimmi inatsisit pillugit suut pisinnaatitaaffiginerai ilitsersussavaa.

Imm. 2. Meeqqanik illersuisup isumaginninnerup iluani ilisimasallip qulakkiissavaa:

- 1) suliamik sularinninnermi aqquaakkani tamani meeqqap pisinnaatitaaffisa eqqortinnejarnissaat,
- 2) meeqqap isumaata saqqummiunneqarnissa, kiisalu
- 3) meeqqap naammagittaalliuuteqarsinnaaneranik siunnersorneqarnissa.

Imm. 3. Meeqqat tapersorsorneqarnissaannut Inatsisartut inatsisaat § 43 naapertorlugu, meeqqanik illersuisup isumaginninnerup iluani ilisimasallip meeqqamik oqaloqatigininnerup nalaani meeraq ikiorsinnaavaa.

Imm. 3. Meeqqanik illersuisup isumaginninnerup iluani ilisimasallip suliani suliamik sularinnittuuffimmini imaluunniit siusinnerusukkut suliamik sularinniffigisimasamini ikuuttassanngilaq.

§ 12. Meeqqanik illersuisoq isumaginninnerup iluani ilisimasalik, tassaavoq inuk meeqqanik isumaginninnerullu iluani sullissinermik ilisimaarinnilluartoq kiisalu Isumaginninnermik Aqutsisoqarfimmit pikkorissaatigineqartumik meeqqanik illersuisutut pikkorissarsimasoq.

Imm. 2. Imm. 1 naapertorlugu inuk inunnik isumaginninnermi siunnersortitut, perorsaasutut, politiitut inatsisilerituutulluunniit ilinniagaqartoq kiisalu meeqqanik isumaginninnerullu iluani sullissinermik ilisimaarinnittoq, meeqqanik illersuisutut pikkorissarsimanissamik piumasaqaateqarfingineqassanngilaq.

§ 13. Kommunalbestyrelsip meeqqanik illersuisut isumaginninnerup iluani ilisimasallit ikinnerpaamik marluk illoqarfinni eqqartuussivilinni tamani toqqassavai.

Imm. 2. Meeqqanik illersuisoq isumaginninnerup iluani ilisimasalik piffissami kommunimut qinigaaffimmi 1-im toqqarneqartassaaq, toqqaqqinnejarnissamut periarfissaqarluni. Meeqqanik illersuisup isumaginninnerup iluani ilisimasallip suliani piffissami toqqagaaffiusumi qimappagu, communalbestyrelse meeqqanik illersuisumik isumaginninnerup iluani ilisimasalimmik nutaamik piffissap toqqagaaffiusup sinnerani atuuttussamik toqqaassaaq.

Kapitali 5

Inissiinerup nalaani meeqqamut najuineq attaveqarnerlu

§ 14. Meeraq inunnut aalajangersimasunut, matumani angajoqqaatut akisussaassusilik ilanggullugu, attaveqartassanngitsoq communalbestyrelsip aalajangersinnaavaa.

Imm. 2. Najuineq attaveqatigiinnerlu kipitinnejassappata piumasaqaataavoq:

- 1) kipitsineq meeqqap ukiuminut naleqquttumik sutigut tamatigut alliartornera, peqqissusia ineriartorneralu eqqarsaatigalugit pisariaqartoq,
- 2) meeraq angajoqqaaminit inummilluunniit isumassortigisaminit allamit, aqqatigut taasamit pitsaanngitsumik attaveqarfingineqarnissaminut illorsorneqartariaqartoq,
- 3) angajoqqaat meeqqap pisariaqartitaanik paasinnissinnaannginnerat,
- 4) meeraq toqqissimangippat, imaluunniit
- 5) pissutsit assingusut atuuttut.

Imm. 3. Aalajangiineq inunnut aalajangersimasunut aqqisigut taasanut tunngatinneqassaaq.

Imm. 4. Aalajangiinerup piffissamik sivisunerpaamik qaammatinik 12-inik sivisussuseqartumik killilerneqarnissaa, aammalu imm. 1 naapertorlugu najuinermik kipitsinerup ingerlaannarnissaa atorunnaarsinnejarnissaaluuunniit piffissap naanissaa sioqqullugu kingusinnerpaamik qaammammik 1-imik sioqqullugu communalbestyrelsimit aalajangerneqarnissaa piumasaqaataavoq. Kommunalbestyrelse aalajangiinngippat inerteqquteqarnermik aalajangiineq qaammatit 12-it qaangiunneranni siumut ilisimatitsinertaqanngitsumik atorunnaassaaq.

Imm. 5. Meeraq imm. 1-imi taaneqartumik aalajangiisoqarsimagaluartoq angajoqqaatut akisussaasumut attaveqarnissamik kissaateqarpat meeqqap attaveqarnissaa akornuserneqarsinnaanngilaq, aatsaalli taamaaliortoqarsinnaalluni tamanna eqqartuussivimmit aalajangerneqarsimappat.

§ 15. Meeqqap inuillu aalajangersimasut, matumani angajoqqaatut akisussaasoq ilanngullugu, attavigiinnerisa kommunimi sulisunit nakkutigineqarnissaa communalbestyrelsip aalajangersinnaavaa.

Imm. 2. Meeqqap inuusuttulluunniit inunnut aalajangersimasunut, matumani angajoqqaatut akisussaasoq ilanngullugu, attavigiinnerat ulloq unnuarlu paaqqinniffimmi allamiluunniit aalajangersimasumi piissanersoq aammattaaq communalbestyrelsip aalajangersinnaavaa.

Imm. 3. Meeqqap ukiui perungassusialu eqqarsaatigalugit nakkutilliisoqarnissaata qanoq ittuunissaa pillugu meeraq oqaloqatigineqassaaq.

Imm. 4. Nakkutigisamik najuinissamut piumasaqaataavoq:

- 1) kommunimit sinniisutitamik imaluunniit kommunimit paaqqinniffiup inissismaffigisaanit najuinermi peqataasoqassasoq,
- 2) aalajangiineq meeqqap ukiuinut naleqquttumik sutigut tamatigut alliartornera, peqqissusia ineriartorneralu eqqarsaatigalugit pisariaqartuussasoq, aamma
- 3) annikinnerusumik iliuuseqarnissaq periarfissaqanngitsutut isigineqartoq.

Imm. 5. Angajoqqaat najuinissaminnik ajornartorsiuteqarpata, taava communalbestyrelsip najuineq aallartittariaqarpaa, taamaalilluni angajoqqaat najuinermut atatillugu najuinerullu nalaani ikorfartorteqartinneqarlutik.

Imm. 6. Najuinerit nakkutigineqarnissaanik aalajangiineq iliuusissatut pilersaarummi allassimassaaq.

Imm. 7. Najuinerit nakkutigineqartut tamaasa kingornatigut najuinerup qanoq ingerlasimanera pillugu nakkutilliisup allakkiaq najuinermik nakkutigineqartumik aalajangiinerup aalajangiusimaneqarnissaanik isummernissami ilaatinneqassaaq.

Kapitali 6

Tapersersorteqarnissaq aamma attaveqartarfegarnissaq

§ 16. Meeqqap ulloq unnuarlu paaqqinniffimiittup tapersersorteqarnissaanik attaveqarnissaanillu aalajangiineq ulloq unnuarlu paaqqinniffiup qinnuteqarneratigut communalbestyrelsimit aalajangerneqassaaq. Qinnuteqaat ajornannngippat angajoqqaatut akisussaasoq peqatigalugu suliarineqassaaq.

§ 17. Tapersersortaasussaq attaveqarfissarlu pisortamit, taamatuttaaq tapersersortaasussamut attaveqarfissamullu ilitsersuinissamik pisinnaatitaffeqartumit, atorfinitsinneqarlunilu soraarsinneqassaaq.

Imm. 2. Naalakkersuisut kommunillu ulloq unnuarlu suliassaqarfimmi akigititanik isumaqatigiissutaat malillugit akissarsiassat atorfinititaanermilu atugassarititaasut aalajangersarneqassapput.

Kapitali 7

Naammagittaalliuuteqarsinnaaneq

§ 18. Nalunaarut manna malillugu communalbestyrelsip aalajangiineri Isumaginnittoqarfiup aqunneqarnera aaqqissuussaaneralu pilligit Inatsisartut peqqussutaat malillugu Isumaginninnermi Naammagittaalliuuteqartarfimmut naammagittaalliuutigineqarsinnaapput.

Imm. 2. Nalunaarut manna malillugu aalajangiinernut meeqqat suliat imminnut tunngassuteqartut pilligit naammagittaalliuuteqarnissaminnut pisinnaatitaapput.

Kapitali 8

Atortuulerfia

§ 19. Nalunaarut 9. november 2017-imi atortuulerpoq.

Imm.2. Peqatigisaanik meeqqanik inuuusuttunillu ikorsiisarneq pillugu Namminersornerullutik Oqartussat nalunaarutaat nr. 32, 14. december 2006-imeersoq atorunnaarpoq.

Namminersorlutik Oqartussat, ulloq 8. novembari 2017

Sara Olsvig

/

Julie Præst Wilche

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut